



政治典訓初集

卷五十六
蠲租二



政治典訓初集卷第五十六

蠲租二

○康熙二十七年。二月庚戌

上以廣東巡撫李士禎疏言臨高澄邁二縣自
康熙十九年至二十五年無徵銀五萬四
千五百餘兩

命部議豁免以聞。

○三月壬辰

上從總漕慕天顏請。自康熙十七年以前所欠漕項銀及米麥盡行蠲免。

○康熙二十八年正月壬午

上駐蹕平原縣七里舖

親製詔諭山東巡撫錢瑀曰。朕軫恤民隱。載舉時巡。懋宣德化。勤求疾苦。比至山東。所經城邑。百姓扶老携幼。夾道歡迎。朕問及連歲順成。民生少得安業。因思百姓足則國家充裕。

若期比戶豐盈。必以蠲租減賦。除去雜派為先。邇年以來。各省地丁錢糧。已經節次豁免。山東地丁正賦。意欲來歲蠲除。今先諭該撫速行曉示。日傳三百里。遊村僻壤。咸使聞知。用副朕省耕問俗之意焉。

○癸巳

上以江南通省百姓積年欠糧徵收苦累。諭總督傅蠟塔巡撫洪之傑。江有良曰。朕南巡

以來軫念民依。勤求治理。項至江南。境上宿
遷諸處。民生風景。較前次南巡。稍加富庶。江
南財賦。甲於他省。素切留心。因尚有歷年帶
徵錢糧。恐為民累。出京時。曾問戶部。知全省
積欠。約二百二十餘萬。今親歷茲土。諮訪民
隱。無異所聞。除江南正項錢糧。已與直隸各
省。節次蠲免外。再將全省積年民欠。一應地
丁屯糧。蘆課米麥雜稅。槩與蠲除。自此民免

催徵。官無叅罰。豈不休歟。爾督撫務須切實
舉行。俾下土均沾實惠。副朕愛恤民生至意。
如有以完作欠。侵收肥己諸弊。一經發覺。重
治不貸。夫民為邦本。足民即以富國。朕平日
躬行節儉。一絲一粟。未嘗輕費。所以如此。簡
約者。無非愛養物力。為優恤元元之地。民間
惟正之供。軍國所需。豈易驟言蠲免。適年國
用少裕。故能頻沛恩施。終期藏富於民。庶幾

家給人足。禮讓益敦。漸臻雍穆之治焉。爾督撫其速行傳諭。令咸知朕意。

○七月庚子。戶部題邳州水災。無庸議。

上曰。邳州地勢卑下。水無歸宿。頃朕南巡。乘筏行十餘里。親見滄沒之狀。其地丁錢糧雜項。應行豁免。令該部另議以聞。

○乙卯。

上諭大學士等曰。直隸今歲亢暘。甘澍未降。秋

稼失望。恐小民流離。可遣戶部賢能司官。令同于成龍詳加察勘。作何贍救。又江南邳州多被水災。其被災田畝。應納地丁及漕項錢糧。歷年逋欠。盡與豁免。

○九月庚戌。戶部議覆。郎中殷特等會同直隸巡撫于成龍。察勘直隸被災地方。大城等四十四州縣。衛所城堡。未徵錢糧。應予豁免。並將宣府昌平等倉所貯米穀。自今

年十月始至明年四月止。通行賑濟。米若不敷。動正項錢糧折給。又保定真定順德廣平大名順天河間等府五十六州縣衛所糧額。應按被災分數酌免。

上允行。因

諭大學士等曰。小民生計最艱。今人動稱耕九餘三。談何容易。農家終歲勤動。幸遇有秋。而穀價又賤。欲辦八口衣食。與來歲耕種之資。

猶恐不足。安得寬然有餘。一遇歉歲。便不免顛連困苦矣。惟富饒業戶。陳陳相因。賤買貴鬻。每獲厚利。然賴有富戶居積。猶得散糶民間。以濟荒歉。使盡皆災黎。其何以堪。自古帝王生長深宮。少知稼穡艱難。與民生疾苦。朕軫念民艱。時常巡省。周咨博訪。悉知窮簷困苦之狀。實可哀憫。朕前見國用頗充。已將逾年。各省錢糧。次第蠲免。但國家經費出入。當

酌盈虛務期上安下全。公私交濟不得漫無
籌畫。支左詘右。伊桑阿等奏曰。

聖諭誠恤民經國之至計也。

○十一月己丑江南江西總督傅蠟塔請免
徵江寧廊柵之稅。部議不允。

上曰。廊簷蓬搭逐末微利。其租稅可如督臣所
題蠲免。

○庚戌先是湖廣巡撫楊素蘊題德安等六

府州縣被災。因遣戶部郎中舒書等察勘
以被災分數勘實覆奏。

上曰。湖北民被旱災。米穀不登。深屬可憫。被災
州縣。今歲未徵錢糧。與來歲春夏錢糧俱令
蠲免。翌日

上諭戶部曰。朕念小民衣食。惟田畝是賴。必年
穀順成。斯生計無乏。若遭罹荒歉。饋粥尚難。
正賦安能輸辦。今年湖北亢旱為災。已遣官

會同督撫察勘。今據將武昌等府所屬二十九州縣八衛所災傷分數勘明具奏。朕心深用軫念。倘不亟加蠲恤。恐致流移失所。武昌等七府今年錢糧前已全蠲。其被災二十州縣四衛所。康熙二十九年上半年錢糧亦與蠲免。荊州安陸二府所屬被災九州縣四衛所。本年地丁錢糧除已徵在官外。其未經徵收及二十九年上半年錢糧亦盡行蠲免。爾

部速行督撫通行曉諭。務使均沾實惠。以副朕拯濟窮黎至意。如民人或致流散不肖官役。朦混侵牟。及仍行私徵者。將督撫一併嚴加處分。

○十二月乙丑。

上諭戶部曰。朕撫育蒸黎。務期休養。閭閻疾苦。時軫於懷。今覽督臣范承勳奏雲南屯地錢糧。自康熙二十一年至二十七年。每年逋欠。

請分年帶徵。朕念雲南百姓。前曾供億王師。繼又遷移叛屬家口。運送勞瘁。本年正賦。輸將尚屬艱難。復令帶征逋租。必致益滋困累。可將歷年所欠屯賦銀七萬一千二百餘兩。米麥等項十萬七百餘石。盡行蠲免。以示朕軫念民生至意。其令督撫通行曉諭。使百姓得沾實惠。如有不肖官員。仍私自徵比者。督撫指名題參。從重治罪。爾部即遵諭行。

○康熙二十九年六月丙戌。

上諭戶部曰。朕撫育蒸黎。勤求民瘼。務期休養。漸至阜安。閭閻間有疾苦。朕衷時切軫念。近見廣東高瓊等府地丁各項錢糧。歷年逋欠。如係官役侵漁。及豪強頑梗。自應嚴追。倘因丁缺地荒。不能輸納。仍行徵比。照例考成。則小民既困。追呼有司。復罹參罰。徒滋擾累。終無裨益。着該督撫以各州縣舊欠錢糧。不能

辦納情由。詳悉察明具奏。

○九月庚寅。

上曰。巡撫于成龍題報順天保河真順廣大所屬並宣府等處被災地方殊為可憫。其康熙二十八年未徵地丁二十六萬三千五百餘兩。糧五萬七千三百九十餘石。二十九年上半年應徵銀三十一萬一千五百餘兩。糧二萬八千七百二十餘石。可盡蠲免。丙午。戶部

又以于成龍續報直屬被災等處銀一萬三千四百九十餘兩。米一百九十餘石。內有不應免者亦一體豁免。

上從之。

○康熙三十年。二月戊辰。戶部以直隸巡撫郭世隆續報保安州等三十二處被災。其錢糧請分兩年帶徵。議不允。

上曰。保安州被災既經續報。且現供辦軍需。其

未完錢糧俱豁免。

○閏七月乙卯。江西巡撫宋肇以南昌等五府十二縣既遭兵亂。又罹旱災。其新舊民欠錢糧六萬三千餘兩。請帶徵。部議允之。上曰。此所欠錢糧。竟予蠲免。務令小民得沾實惠。如不肖官員。已經徵收。稱為未徵。已奉免追。借端徵取。致累百姓者。察出將所司從重治罪。

○九月庚午。

上諭戶部曰。朕孜孜圖治。軫切民依。閭閻耕獲。時勤咨訪。其有以荒歉上聞者。或蠲或賑。旋即施行。務令得所。念河南一省。連歲秋成。未獲豐稔。非沛特恩。蠲恤。恐致生計艱難。其明年錢糧。着通行蠲免。漕糧並行停徵。

○十二月辛巳。總督倉場侍郎石文桂請京通倉內添設廩房。

上問大學士等曰。各省輓運京師糧米。除一歲所需。每年存餘幾何。伊桑阿奏曰。其數未悉。大約存倉之粟。足供一二年之用。

上曰。治道以愛民為要。而利益民生。務在均沾實惠。思漕運之事。小民良苦。朕常蠲免錢糧。其漕運亦欲特賜蠲征。此念已久。每歲餘米。若足供一二年之需。則來歲漕糧酌量免徵。荊州江寧杭州等大兵駐防處所。又酌量截

留以為儲備。民既現沾實惠。或遇水旱之年。亦有裨益。至於運丁賴運資生。若停輓運。須使運丁不至困窮。亦並議之。翌日伊桑阿等奏曰。察倉內現儲米七百八十萬石有奇。每年所進米三百四十萬石餘。所出米二百八十萬石餘。以倉內現儲米計之。足供三年給發。

上曰。有米如許。朕意將三十一年起運之米。於

江寧京口杭州荊州等處大兵駐防地方酌量截留以備積貯三十二年漕運盡從蠲免民生寬裕於國實有裨益但恐一年漕船不至或有所礙爾等云何伊桑阿阿蘭泰奏曰皇上仁愛百姓之心可謂至矣王熙張玉書奏曰全蠲一歲之漕從古未有且太倉餘粟

亦由

皇上節省所致。

上曰朕此意已久倉內餘米亦非一年二年之所積矣作何蠲免其下九卿確議癸未伊桑阿等又奏滿九卿云漕糧從無蠲例漢九卿云京師根本重地漕糧關係國計似難輕議全蠲况五方雜處人烟湊集需用孔多若一年停運餘米不得北來價將騰踊皇上欲寬民加或將漕米照省分府逐年挨免二三年間即可周徧無有不邀

聖恩者矣。

上曰。朕急思軫恤民生。於都城人民日用之需。未曾計及。漢九卿議良是。

○甲申。

上諭戶部曰。朕撫御區宇三十年來。早夜圖維。以愛育蒼生。俾咸臻安阜為念。比歲各省額徵錢糧業已次第蠲豁。其歲運漕米向來未經議免。朕時切軫懷。所有京通各倉米穀樽

節支給數載於茲。今觀歷年儲積之粟恰足供用。應將起運漕糧逐省蠲免。以舒民力。除河南省明歲漕糧已頒諭免徵外。湖廣江南浙江江蘇安徽山東應輸漕米。著自康熙三十一年始。以次各蠲免一年。至江寧京口杭州荊州大兵駐防地方亦應預行積貯。著將康熙三十一年起運三十年漕米各截留十萬石存置倉教。令該地方官敬慎守視。以備

需用。爾部即遵諭行。

○康熙三十一年七月甲寅戶部題巡視兩廣鹽課太常寺少卿沙拜請將臨高縣舊欠鹽地錢糧豁免。議不允。

上曰。歷年積逋。徵比必致累民。臨高舊欠鹽地錢糧。着俱蠲免。

○十月丙子。山西巡撫葉穆濟題請將三十年帶徵錢糧。并借賑分貯米銀。俟三十一年徵收。

年徵收

上俱從之。復

謂大學士等曰。西安所屬之地。去歲無收。百姓甚苦。今歲雖薄有收穫。明春隨即追徵。小民失業。無以資養。西安巡撫所屬州縣衛所三十二年正供錢糧。應與蠲免。爾等會同戶部

察明以聞。

○己卯

上諭戶部曰。陝西西安等處。連歲凶荒。繼以疾疫。因而閭閻失業。洊致流移。朕軫念民艱。焦勞宵旰。自去歲冬月以來。頒發帑金。蠲免正賦。輓運積穀。轉輸漕糧。屢遣大臣察勘。多方賑濟。念國家所重。惟在養民。目今秦省雖薄有秋收。但民間匱乏已極。倘非格外加恩。無以使積困盡甦。轉徙盡復。陝府所屬州縣衛所。康熙三十二年地丁銀米。着通行免征。從

前所有積欠。亦通行豁免。務俾比屋通沾實惠。小民咸慶更生。用稱朕子愛元元。撫育安全至意。爾部即遵諭行。

○康熙三十二年五月丙午。

上謂伊桑阿等曰。皇長子往祭華山時。平陽百姓曾以歷年帶徵錢糧完納甚艱。上訴平陽地方。數年來田禾歉收。百姓流移者衆。若新回籍之民。令其於本年正供外。帶徵歷年舊

欠民間生計益艱。應蠲錢糧。爾等詳察具奏。
○七月己巳。

上諭伊桑阿等曰。撫綏百姓。俾沾實惠。無如蠲
免錢糧。朕觀廣西四川貴州雲南俱係邊省。
地瘠民貧。不比內地。此四省三十三年應徵
地丁銀米。盡行豁免。爾等撰上傳於八月內
呈覽。

○九月丁巳。浙江巡撫張鵬翮奏杭州嘉興
等八府地方於六月內陸續得雨。勘未成
荒。至秋收時察明再報。

上曰。江浙二省。今歲夏月亢旱。雖未成災。秋收
必歉。若漕糧仍令征收。輓運。恐民乏食。朕常
以此為憂。可將浙江今歲漕糧。概令蠲免。江
南漕糧。今歲或免三分之一。或免其半。至該
省應免之年。照今歲所免米數補征。輓運。則
漕糧不至減少。而官民大有裨益。着滿漢大

學士會同戶部堂官倉場侍郎作速詳議具
奏。

○十月庚辰。

上諭大學士等曰。陝西西安鳳翔二府地方連
被災傷。朕多方賑救。轉粟蠲租。又招集流移。
散給牛種。然後四方化離之民。漸次復還鄉
井。今歲雖雨澤沾足。百穀阜成。而人民甫脫
饑寒。未饒生計。若明歲應徵錢糧。即令輸納。

誠恐閭閻儲蓄終難充裕。西鳳二府屬被災
州縣衛所。康熙三十三年糧米照舊征收外。
其地丁銀兩着通與蠲免。該部即行文該督
撫嚴飭各屬。通行曉諭。務俾均沾實惠。以稱
朕愛養休息至意。如有不肖有司。朦混私徵
者。該督撫指名劾奏。從重治罪。將此旨即傳
諭戶部。

○十一月庚申。

上御軋清宮。召大學士伊桑阿阿蘭泰學士傳
繼祖溫保戴通安布祿常綬戶部尚書馬
齊侍郎思格則法爾哈

諭曰。朕念切民生。或在官中。或舉時巡。無不以
田畝豐歉。閭閻情形。一一諮訪。比年以來。將
各省地丁額賦。節次蠲免。今歲畿輔地方。雖
禾稼未獲稔收。初意小民尚足餬口。頃展謁
陵寢。沿途察訪民間生計。見雨水過溢。田畝歉

收。米價騰貴。又聞順天河間保定永平四府。
雖有數州縣豐稔。其餘大概薄收。目前米價
既貴。將來春夏之際。時值益昂。小民必至艱
食。此朕目所親覩。應將此四府康熙三十三年
地丁銀米。通行豁免。所有歷年舊欠。悉與
蠲除。爾內閣寫上傳呈覽。再通倉每月發米
萬石。比時價少減糶賣。其糶賣時。止許貧民
零糶數升。富賈不得多收轉販。似於民生大

有裨益。爾等會同倉場侍郎等議奏。又蒸造燒酒。多費米穀。今當米穀減少之時。爾戶部速移咨該撫。將此四府屬蒸造燒酒。嚴行禁止。

○丁卯

上曰。蠲免順天等四府一年錢糧。想民間生計。得少寬裕。伊桑阿等奏曰。

皇上將四府明歲一年錢糧。預行蠲免。又蠲歷

年舊欠。則地方官員。無借端徵收之弊。民間大有裨益。

上曰。朕思圖治之道。惟在足民。若將現年額賦。雖蠲至五六分。地方官員。仍有可徵之項。百姓不得均沾實惠。故將四府錢糧。盡數預蠲耳。

○康熙三十三年正月辛酉

盛京戶部侍郎阿喇密請

盛京協濟料草於來歲帶徵。

上曰。此項料草。原為彼處兵民預備。去歲盛京水澇。未嘗收穫。已徵者。則已。未徵者。俱着免徵。

○三月丁巳。戶部題山西巡撫葛爾圖將平

陽府等處未完錢糧。請分年徵收。議不行。

上曰。山陝地方百姓。連被災荒。甚為可憫。若將所欠錢糧。勒定年月帶徵。民愈窮困。此未完

銀兩米菑。可概免徵收。蠲免錢糧。專以為民。必使民沾實惠。蠲免始為有益。或不肖官員。已征在官。仍偽稱民欠。蠲而復征。就中作奸。侵剋入己。亦未可定。此等事發。必依軍法處治。決不姑貸。

○七月己丑。

上謂大學士伊桑阿等曰。朕近聞戶部諸臣。知現今庫帑充牣。民為邦本。必令家給人足。方

稱朕意。今天下太平。兵革不用。國家又無土木無益之費。從前雖因水旱。將民間舊欠錢糧。每歲蠲免。朕意仍覺未愜。今欲將天下錢糧。通免一年。爾等云何。伊桑阿等奏曰。皇上無念不切民生。數十年來蠲免錢糧甚多。賑濟亦不勝計。今又頒

浩蕩之恩。欲通免海內錢糧。如天之德。實從古帝王所未有。但國家歲入之數三千餘萬。

每年經費約計二千萬。今若一年不征。即至兩年不解。誠恐公用不繼。或酌量蠲二三分。或蠲半年。於民亦得休息。

上曰。爾等既為國用慮。或且蠲免半年。若蠲上半年。於民似更有益。王熙張玉書奏曰。

皇上沛此殊恩。不獨黎民感悅。臣等亦欣戴無既。但一時併蠲。所免錢糧甚多。或分省挨年輪蠲。似為更安。

上曰。爾等閒暇時。會同戶部詳酌具奏。

○十一月丙子。大學士等奏曰。安州等十一州縣。因今歲米穀薄收。

皇上特遣部臣會同巡撫察勘。發米四萬六千餘石賑濟。將此米一半散給。一半照時價給銀。其餘剩米石減價發糶。貧民不但得以度日。尚有可置生產者。實非臣等意見所及。

上曰。貧民雖散給銀米。若來歲錢糧不蠲。亦有何益。安州等十一州縣。明年地丁錢糧。可盡免之。

○康熙三十四年。九月癸未。戶部題。霸州等二十州縣。被災田地。應免錢糧。照例請免。上曰。香河寶坻二縣。田地。被災甚重。今年錢糧。除已完外。其未完錢糧。通行蠲免。又

諭戶部曰。直隸順天保定河間永平四府所屬

地方今歲水潦傷稼三農歎收。朕巡幸所至。徧加諮訪。聞高阜之產。尚有秋成。而早下之田。被潦者多。計所收穫。不能相敵。雖經勘災。頒賑不致化僞。失所。而額辦錢糧。若仍征取。則民力匱乏。難以輸將。朕心深切不忍。着將四府康熙三十五年地丁銀米。全與蠲免。用示寬恤。其霸州雄縣香河寶坻四處。皆有水道。可以轉輸。每處着發米一萬石。各司官一員。費往彼處。減時值發糶。以資民食。着行文該撫通行曉諭。俾均沾實惠。副朕軫念災黎至意。

○十月乙未。戶部題奉天府府尹王國安將奉天所屬開原廣寧等九州縣。除蠲過錢糧外。其應征錢糧。請今年暫緩徵收。分年帶徵。

上曰。盛京地方。今年田穀所收甚少。若將應征

錢糧分年帶征。有累百姓。着將今年錢糧一概蠲免。

○十一月庚申。直隸巡撫沈朝聘題宣化府所屬被災田地。請將三十四年所欠錢糧。并三十五年錢糧。緩至三十六年三十七年帶徵。

上曰。宣化府所屬地瘠。田禾被災。今年除已經徵收外。未完錢糧。皆免徵收。其三十五年錢

糧。亦照順天等四府之例。槩行蠲免。

○辛酉。戶部題東安宛平等被災州縣錢糧。請照例蠲免。

上曰。東安宛平等地方。田禾被災者甚多。今年錢糧。除已經徵收外。其餘未徵者。可通行蠲免。

○康熙三十五年。八月甲申朔。戶部覆奏直隸巡撫沈朝聘請免香河寶坻等十一州

縣錢糧。議不允。

上曰。頻年水災。禾穀不登。民生困苦。其人丁錢糧。俱予蠲免。

○辛亥。戶部覆總漕桑格請蠲隨漕錢糧。議不允。

上曰。漕糧雖無蠲除之例。而運丁每年運糧甚為勞苦。宜如該督所請。盡免之。

○九月丙子。

上諭。戶部曰。宣化府錢糧前已蠲免。但比年所屬各州縣牧養軍前需用馬匹。又大兵絡繹往來。雖各有支給經費。而供億甚繁。殊勞民力。朕巡幸經臨。深切軫念。着將康熙三十六年宣化府屬地丁銀米。全與蠲豁。仍行文該撫通行曉諭。俾民間均沾實惠。以副朕寬恤黎元至意。爾部即遵諭行。

○十二月己丑。

上諭戶部曰朕惟治天下之要以安民生為急。顧欲安民生必除寇虐。欲除寇虐必事師。旅方今窳宇承平。人咸樂業。獨厄魯特噶爾丹狂逞邊塞。荼毒生靈。朕思為邊境人民永絕後患。故特遣貌貅分道進剿。朕躬不憚勤勞。以今歲春月親統中路大兵深入無水草之地。直抵拖訥比噶爾丹。聞朕親臨。盡棄輜重。倉皇宵遁。適與西路大兵相遇。大敗潰散。

俘獲甚眾。其寨桑等相繼來降。而噶爾丹收殘賊千餘人。仍竄伏於枯倫白爾齊爾等處。地方朕因於冬月復統軍出邊。相機勦撫。行抵鄂爾多斯。於是厄魯特人民來歸者絡繹相續。噶爾丹力窮勢蹙。亦遣格壘沽英具奏乞降。隨經頒示勅諭。許其歸順。惟是噶爾丹乃狡詐巨測之人。其果否來降。未可深信。應仍厲兵秣馬。待來歲出師撲勦。務絕根株。比

年以來。軍前需用馬匹。在大同府屬牧養者甚多。措辦草料。雖俱支用正供。而供億浩繁。殊勞民力。但必此賊盡滅。然後邊外蒙古。賴以輯寧。而在內生民。亦獲休息。師旅之興。大非得已。該郡官民。尚各勉力急公。勿以煩苦為慮。朕茲從邊外。返蹕雲中。深軫民力之艱。用沛特恩。以示寬恤。康熙三十六年。大同府屬州縣衛所。應徵地丁銀米。全與蠲免。俟噶

爾丹殄滅之後。朕自誕布德音。渙敷休澤。爾部即行文。該撫通行曉諭。俾咸悉朕惠愛黎元至意。特諭。

○辛亥。

上諭戶部曰。朕惟治安天下。必期生民得所。而民生之得所。必以敷恩寬賦為要。朕於一切事務。稍有動用民力之處。即屢懷殷切。刻不能忘。比年以來。因厄魯特噶爾丹狂逞逆命。

遣發大兵。分道進剿。軍興供億。不得已而煩
民力。甘肅所屬各州縣衛所。及榆林等處。沿
邊各州縣衛所。適當師行要道。喂養軍前需
用馬匹。并大兵往來經過。各項措辦。雖俱支
給正項錢糧。而供億煩多。閭閻勞苦。朕心深
用軫念。着將康熙三十六年甘肅巡撫所屬
州縣衛所。陝西巡撫所屬榆林等沿邊州縣
衛所。地丁銀米。盡行蠲免。行文各該撫。徧加

曉諭。務俾小民均沾實惠。稱朕體恤黎元至
意。甘肅所屬銀米。既經全免。需用錢糧。着於
隣近省分作速給發。爾部即遵諭行。

